



مناسب شرایط یاراتماغینان ذکالی اوشاقلارین چیچکنمه سینه امکان یاراتماق لازمدیر. اما اولجن ذکالی اوشاغی تانماق لازمدیر.

بوگونکی دنیاذا ذکا بنله تعریف اولور: قضاوت و استدلال ائلهماق گوجو. یعنی ائله انسانا ذکالی دئییلر کی اؤز اطرافی اینن سازگار اولا و متناسب رفتار ائلهیه. طبیعی ذکا 90 دان 110 آراسی تعریفلیب. اوندان یوخاری ذکا صاحبی اولان انسانلارا ذکالی دئییلیر.

ذکا، ریاضی ذکاسی، منطق ذکاسی و موسیقی ذکاسی کیمی مختلف بۇعدلارا بۇلونور. یعنی اولا بیلر بیر انسان فقط بیر بۇعدا ذکالی اولسون اما سایر بۇعدلاردا ذکاسیز اولسون.

بیر اوشاغین ذکالی اولوب اولمادیغینی ارزیابلیق ائلهینده ذکایا تعریف اولان فاکتورلارین بیر نچه سی اوندان اولمالیدیر یوخسا فاکتورلارین بیرین اولماسی اینن بیر اوشاغا ذکالی دئمک اولماز.

ذکالی اوشاقلار یاشیتلارینا نسبت داها تتر یئریماق و دانیشماغی اؤرگشرلر. اولار یاشیتلارینا نسبت داها تتر کامل جمله قورارلار و خیال قوه لری گوجلر اولار. اوچ یاشلی ذکالی اوشاق اطرافا چوخ کنجکاو اولوب چوخ سؤال سوروشارلار.

مدرسه یاشینداکی اوشاقلاردا ذکاوت نشانه لری

ذکالی اوشاقلار یاشیتلارینا نسبت متفقیترلی چوخ اولار. اولارین حافظه لری گوجلر اولار. اولاری بو یاشدا سیستمین اجزاسینی و آرالارینداکی رابطه نی راحتلیغینان تشخیص وئرلر. اولارین لیدرلیق گوجو چوخ اولار و گروهی فعالیتلرده مدیریت ائلهماغی و امر وئرماغی سئورلر. اولار کنایه لی سؤزلرین معناسینی تشخیص وئرلر بیر حالداکی معمولی انسان، بو ایشی نوجوانلیق یاشیندا گۆره بیلر.

الده اولان معلومات گۆرسدیب کی اوشاقلارین ذکاسینی گوجلندیرماق اوچون اولاری داها بوروشوق محیطلر معرضینده قویماق و اولارینان چوخ دانیشماق لازمدیر. بو مسأله سیچانلاردا دا آزمایش اولوب. بوروشوق و تنوعلو قفسده بۇیون سیچانلارین ذکاسی ساده قفسده بۇیون سیچانلاردان داها یوخاری اولور.

اوشاقلار شعر و قرآن ازبرلتماق، اولارین لغت دایره لرینی گنجیشلندیریر و دانیشیق قابلیتیرینی گوجلندیریر.

اما ذکالی اوشاغا «سن هامیدا ذکالیسان»، «من سنه افتخار ائلیرم» کیمی سؤزلر دئماق دوز دئییل. چونکی بو سؤزلر اولاردا اؤزلریندن انتظار یارادا و انتظارلاری اولان ایشی دوزگون یئرینه یئتیره بیلمه یینده روحدان دوشرلر. اولاری تشویق ائله یینده گۆردوقلاری ایشی تعریفله یین اونا بو ایشی گۆردوغو اوچون آفرین دئیین.

اوشاقلار بیر آغاج نهالی کیمیدیلر. اولاری هر طرفه هدایت ائله سز او طرف بۇیویه جاقلار. سیزین وظیفه ز اولاری دوز هدایت ائلهماق و بۇیومه لری اوچون مناسب شرایط یاراتماقدیر.